



PL
2463
Z7C52
V.2



此木軒四書說卷三

金山

焦袁熹廣期

著

論語二

子曰惟仁者章

漢和帝詔引論語唯仁者能好人能惡人。貴仁者好惡得其中也。按得其中。即書所謂無偏無黨。大學所謂親愛賤惡無辟也。故以明大居正之義。

子曰富與貴章

欲富貴惡貧賤。人之大情。君子亦不能與人異。所謂吾豈惡此而逃之也。欲惡未便為惡。惟徇其欲惡之

私而不能有以自克。乃爲惡耳。所謂人心惟危也。不以其道得之。是人之恒言。貧賤亦言不以其道則道字之輕可知。首節言取舍之分。謂之麤者。非謂富貴貧賤是粗事。不處不去。所急在義利之辨。於體仁之學猶爲粗也。如不耻惡衣食。子路車馬輕裘敝之無憾。緼袍狐貉與立不耻。皆其類也。末節言存養之功。謂之細密者。非謂造次顛沛是細密事。其所以無違必於是者。非有至細至密之功不能也。克己復禮出門如見大賓。使民如承大祭之屬是也。所謂如切如磋如琢如磨。先脩而後精也。終食無違。不但不止言

貴貧賤。亦不止是欲惡之累。造次顛沛。其事亦不
所以處此造次顛沛者精也。取舍之分益明。充其極
則為聖人之仕止久速。各當其可。精義入神。不但
惑於義利而已。解此章者多謬。故畧辨之。

富貴不以其道。如主彌子得衛卿。受齊王萬鍾之類。
非謂乞墻壟斷之事也。若十分狼籍之事。則又何待
於審。

不以其道之富貴。是不意儻來。處之亦似不害者。故
以不處為貴。非謂邪徑僻塗。不待審而知者也。

君子存養之功。純純常常。更無罅隙。從造次省看。

見其必於是。逆顛沛皆看他。亦見其必於是。在君子則前後際一般。不是獨把持此處。正如歲寒知松柏。未寒以前。既寒以後。松柏只是如此。顛沛必於是。則不以生死動其心矣。此是極頭處。視聽言動必於禮。出門如見大賓。使民如承大祭。皆是存養工夫。非離却日用事物。默默照看此心。而後謂之存養也。

子曰我未見好仁者章

我未見好仁惡不仁者。我未之見也。只首尾兩未見。語氣相類。若中間我未見力不足者。自是決斷之詞。

何得與上下未見作一例。不知前輩何以憤憤若此。如輔慶源云。次言用力者之未見。可謂憤憤之甚也。夫子所謂未見者。只緣當審學者多不能如此。夫子望之切。故警之深。不必疑及門高賢。總不足以當之。世好仁惡不仁。剛者內自訟。好德如好色。皆當如此。看惟求志達道。註謂伊呂之徒。則實是未見爾。此與樂水章知仁相似。只是各得其性之所近底意思。非謂好仁者不必惡不仁。而知者竟無仁也。註天下之物。指利欲之類言。非謂好義尚不如好仁。仁統萬善。義禮智信。凡屬天理一邊。皆仁也。

此不車四言言
子曰人之過也章

這厚薄忍愛都是做得不停當的。然這兩種過却如白黑之不可相溷。故曰各於其類。

子曰士志於道章

聖人言士志於道者。不免耻衣食之惡。又以子路不恥緼袍爲人情所難。不如此知辛苦。不足以爲聖人。正如問何不食肉麋者。定是做不得天子也。

子曰君子之於天下也章

君子之心。無所偏主。以義為主。凡事當做與不當做。只看義如何。義所當爲。則勇往以從之。其迹似適。而

實非適也。義所當止。則鎮靜而不動。其迹似慕。而實非莫也。君子之於天下。無不皆然。豈一切恃才智。任氣質者所可及哉。

子曰君子懷德章

懷德是好仁事。懷刑是惡不仁事。懷德見善如不及。懷刑見不善如探湯。

懷刑者自進於懷德。而懷德中有無限妙境。懷土者必至於懷惠。而懷惠中有無窮醜態。君子小人。總沒有滿足的日子。

懷私曰懷。君子懷德。亦是私自念之。不以告人。

子曰放於利而行章

私已而不恤人。故多怨。此夫子警戒小人之詞。

子曰不患無位章

患無位。謂不得其位。則無以行道而濟民。故教之以
患所以立。正為所以立者之難。如漆雕開言吾斯之
未能信是也。患莫知。亦是謂道德學問。必以人知為
驗。故欲人知己之有此具也。教之以求為可知。正懼
聲聞過情。惟務實之為急。若夫志在富貴。但求邦家
必聞者。此等之人。蓋將無所不至。豈復可與言患所
以立。求為可知哉。

患無位。是欲有爲於天下。故告之以患所以立。若只從爵祿上起見。便不須如此說矣。

子曰參乎章

聖人這箇一。無絲毫欠缺。絲毫病痛。所以千條萬緒。曲折細微。無不是這箇道理貫通去。更無阻格。更無遺漏。中庸說至誠至聖等章。便是一以貫之注脚也。一箇忠做出百千箇恕。若忠有一毫欠缺。百千箇恕都做不成。所謂一以貫之者。如是而已。

即如鄉黨一篇。一事是一箇恕。若其所從出之故。則只是一箇恂恂也。出於此。便便言也。出於此。不是恂

此一箇源頭。便便又是一箇源頭。

無忠做恕不出。忠有一毫不圓成。少間做出恕來。便都是扁的。如何做得恕成。故曰一以貫之。此最說得親切。

其為物不貳。則其生物不測。天地無心而成化。是且不可以一貫言。而況於忠恕乎。但以其理推之。則初無異耳。

曾子問一篇。設許多變事。以求處之之理。聖人於此等處。豈嘗一一預先講究來。隨問隨答。更不須思索。此無他。義精仁熟故也。禮雖先王未之有。可以義之。

非一以貫之。其何能如是。若曾子者。隨事精察力行。蓋覺得有窒礙處。便去思索。不敢信心自是。而折衷於聖人。必求用處。無一窒礙而後即安。此非枝葉上事。蓋理會身心上事。工夫最爲切要。故能一旦豁然貫通也。

子曰君子喻於義章

喻義則大。喻利則小。故印子以商賈之民爲至細。無他。所知者利而已耳。

小人喻利。其智識亦有出於常人意慮之外者。此豈天爲之耶。乃是不善用其才之過。所謂非才之罪也。

此乃車口言
然于天理上無一毫覺悟。乃所以爲昏濁之至。銅敵之尤也。

子曰見賢思齊焉章

見賢便思齊。見不賢便內自省。今日如此。明日亦然。是知所見之賢不賢。其等不同。賢是勝於己者。一言一行亦有之。不必定是大賢人。若必大賢而後思齊。則或終身不得見一賢。上一句只虛設矣。

見賢思齊。見不賢內省。見義不爲。見其過而內自訟。見善如不及。見不善如探湯。數處見字。皆是人所易見者。難處全在下截。徒責其知之不真。而不責其志。

之不篤。行之不勇。非聖人當下立言之意也。

子曰父母在章

父母年力不同。有稍衰者。有極衰者。而人子之所處亦異。有富有貧。有衆有獨。則是不遠遊者。未可以道里爲限斷也。或千里爲遠。而二三百里爲近。或一二百里。甚至二三十里。即爲遠而不可遊者。聖人立此一句。一切情事畢該其中。下言遊必有方。則正是不遠之義。蓋事故有必不得已者。大約是王家之事。畏此簡書是也。

子曰三年無改於父之道章

論語文重出者。蒙師多不授讀。此非也。三年無改之
文。上下皆言人子事。不在其位不謀其政。下文曾子
引象辭。意似相發。今皆不授讀。即與刪去何異乎。

子曰父母之年章

壽即是衰。喜懼非兩念。

子曰德不孤章

世教固有盛衰。人材亦有饒乏。但人能自脩仁行。謹
雖遇世風極汚。人材絕少之日。亦自有人與相應和。
相扶助。不至隻立無偶也。曰必有鄰者。不必多得而
不至絕無之謂。若云人性皆善。天下同此心。則同此

德。是則人人皆我鄰矣。必有之文。竟成長語。言之奚益。不言奚損。此非聖人意甚明。

子謂子賤章

正於能取見子賤之賢。何得謂專靠別人。正如紹堯得人。非舜之聖。安能紹堯。安能得人也。

子貢問曰賜也何如章

世說謝混問羊孚。何以罷舉瑚璉。曰。故當以爲接神之器。按此言是也。若徒以珍麗取之。則一切金玉之物。便當與瑚璉爭賈乎。

或曰雍也仁而不佞章

當皆以佞爲有口才。自是好字。故不佞爲謙詞。而或人云然。自聖人惡而斥之。於是人人知道佞是不好字。

孔穎達左氏傳疏云。佞非善事。而以不佞爲謙者。佞是口才捷利之名。本非善惡之稱。但爲佞有善有惡耳。爲善敏捷是善佞。爲惡敏捷是惡佞。但君子欲訥於言而敏於行。言之雖多。情或不信。故云焉用佞耳。按孔君之論善矣。或人稱雍不佞。是謂不能善佞。非惡佞也。夫子則以佞是口舌捷利。爲善者少。爲惡者多。故曰焉用。若夫辨道之詞。論事之才。施於所當用。

者固不得以佞目之。且文莫猶人。尚非君子所急。故直斥之曰。焉用佞也。

孟武伯問子路仁乎章

無私合理。全體不息。斯謂之仁。一事上要無私。又要合理。事事上要無私。又要合理。至於純亦不已。則全體而不息矣。

大段是仁之作用了。但少細密工夫。只算得是治賦之才。

子謂子貢曰女與回也孰愈章

若只空空說箇何敢望回也。未見得最是知十知二。

說得分際較然。真箇弗如處于此。見得分明。雖欲不自屈而不能。此夫子所以與之。

知是真實自知。屈是真實自屈。其不安於不如。而猛力精進也決矣。夫子所以與之也。

聞一知十。是一套事。若另是一頭。則容有所不知。所謂格一物而盡窮天下之理。雖顏子亦不能也。

橋玄傳。仲尼稱不如顏淵。註引論語。因更其文云。吾與女俱不如也。按此兩俱失之。論語文無俱字。以與爲及義。義雖得通。非聖意也。

子貢曰。我不欲人之加諸我也。章

子貢自是真箇欲無加。不是姑且言之。只是不曾向身心上實實體驗。實做工夫。所以輕易說箇無字。夫子猶曰仁吾豈敢。子貢聰穎有餘。德性不若冉閔淳厚。何能及也。然子貢亦言已之志欲如此爾。非便以仁自處也。但順口說一無字。不自覺其甚難。此便是虛而不實。粗而不細處。一聞夫子非爾所及之言。自然有所警而思進。以此知聖人造就之功大矣。

子貢曰夫子之文章章

不可得而聞。是極歎其美。猶云中庸不可能也。非必不可得聞。亦非夫子自言。人自不聞。

子貢問曰孔文子章

不如丘之好學。發憤忘食。樂以忘憂。是也。有顏回者。好學。欲罷不能。既竭吾才。是也。若孔文子之好學。只是耽嗜典籍。異於原伯魯一流人而已。

子張問曰令尹子文章

朱子於三仁章云。觀鳳一羽。則知五色之備。然則子文文子之忠清。所謂未知焉得仁者。觀其毛色。早知不是鳳也。這裏如何瞞得聖人。

季文子三思而後行章

第一次思已見得箇大概了。再加研審。自是十分精

細。所以爲可。若思之而依舊糊塗。便算不得一思。如何限定再思便可。

固是論是非不論成敗。計可否不計利害。然所謂成敗利害者。亦以一身一家之私而言耳。若國事之成敗。民生之利害。則即是是非可否所在。豈得鹵莽做去。蓋是非可否看得精。成敗利害固在其中也。

子曰甯武子章

此章之愚。如濂溪之所謂拙。是將不好字面。說極好的事。

原沒有兩副心腸。兩番作用。只是遇着事故。便露出

他真正忠愛來。所謂歲寒然後知松柏也。

元凱註左傳云。魯人失所賦。甯武子佯不知。此其愚不可及。按孔子所謂愚者。以其心志專壹於君。利害禍福。一切懵然。智巧之士。皆笑其所爲。故直目之曰愚耳。然說論語者。皆以爲甯子佯愚。如杜此註。亦以爲此其愚之一事矣。

伯夷叔齊

鑿空妄作。以欺後世。莫甚於古人。如伯夷叔齊。不知其名。古今所同也。何由得獨聞之。而曰公允云云乎。此類蓋不可勝舉也。

子曰孰謂微生高直章

微生高素有直名。何故乞鄰而與。作此瑣屑事。蓋直者有則曰有。無則曰無。高欲說無。肯恐人疑已以有為無。損其直名。故多方取得那物來與他。令人不我疑耳。而不知以此等為直。自欺欺人。乃不直之尤者。故夫子譏之。

子曰巧言令色足恭章

諂佞險詐。二者人所共恥。而為之者。習氣熟而蔽錮深也。聖人言此。有提撕警覺之意。蓋人之本心。有終不能喪盡者。患不知其可耻耳。聞聖人之言。亦當猛

省矣。

此兩種人所以可耻者。爲其不直也。夫子嘗言巧令鮮仁。不直則必不仁。且如以言色悅人。以足恭媚人。求其稍存愛敬之實心。必不可得。非不仁而何。左丘明耻之者。丘明自言耻之而不爲也。丘亦耻之者。亦夫子自言耻之而不爲也。固非謂代彼人耻。而警人之意在其中矣。

既怨之。又匿而與之友。則是自欺其本心。故爲可耻。不必定是心藏戈戟。伺隙而發。若是此等陰賊之人。則大惡而可惡。非直耻之而已。然不耻匿怨。爲此大

惡亦不難。在學者則當察其隱微。如孟子言充無窮
審之心。此聖人意也。

老者安之三句

夫子只是說極平極實本分底話。那知却是函蓋乾
坤之句。

子曰雍也可使南面章

居敬節是推原夫子未發之意。謂夫子雖可子桑之
簡。而簡有不同。居敬為可。大簡則未可。夫子之意恐
當如此。非是相駁難之詞。反似已智有過於師。而夫
子答曰雍之言然。不言吾意正爾。歸美門人。似言起

予者商矣。氣象絕可思玩。

主敬行恕。邦家無怨。克己復禮。天下歸仁。此天德也。推之以行王道。則善人之勝殘去殺。仲弓其優乎。夫子之立立道行。顏淵其庶乎。

寬洪簡重。只就模樣說。其所以有此模樣。則以仲弓之德行過人也。

孔穎達詩洵直且侯疏云。言其有人君之度。孔子稱雍也可使南面。亦美其堪為人君。與此同也。按以侯為君。此自毛鄭之失。而朱子註論語用孔此句。亦知以人君之度稱人。不嫌於僭矣。

哀公問弟子孰為好學章

怒與過對說。亦是微有不合於理。而為情所使者。雖怒而能不遷。則幾於無我。為好學之驗耳。如舜之誅四凶。則與天合德。顏子尚未及此。顏子犯而不校。聖人豈復可以不校言。此所謂未達一間者也。

今也則亡。未聞好學者也。講家以上句指及門。下句泛言之。此不然也。兩句皆指及門。正答哀公弟子孰為好學之問。不必泥聞字。亦不以重複為嫌。正要於此見得告本國之君。其言勤倦懇至有如此者。今也則亡。未聞好學者也。二句皆主諸弟子言。不當

此不事四言
泥聞字。以下句爲汎指當世。聖人承本國之君。下問弟子好學。不勝情意深至。言有盡而思無窮。自不能訕然而止。若在他國。或未必如此。至答康子。則但舉氏名。此等處最足見聖人盛德之至也。

子華使於齊章

冉子原思。只是心上覺得不如此便不安。遂斷然行之。只道是本分當然之事。不知其有害於義也。至於市恩以爲俠。矯廉以爲異。純是一團私欲。則小人之所爲。而聖人之所以不屑教者矣。

中庸不可能。須是義精仁熟。而無一毫人欲之私。方

能事事到恰好處。二子之過。亦是人欲之私所致。但
不是世俗所謂人欲之私耳。

晉書。桓玄逢老公乘青牛。即以所乘牛易取所乘。是
駕車之牛。與論語乘肥馬同義。非若今之單騎一牛。
而謂之乘也。

子曰回也其心三月不違仁章

日月至焉。亦是學力所致。與常人所謂本體之明未
嘗息者有別。

對其餘言。則顏子是至明至健。若對聖人言。則顏子
之心。雖明而不免有一毫之蔽。雖健而不免有一息

此乃車口言
之間。是猶未得爲至也。此正一間未達處。
夫子川上之歎。正是喫緊爲人之意。人心與道爲體。
不容使之有息。便到純亦不已地位也。只是復其本
然。然其要只在慎獨。此是天理人欲消長之機。而仁
道絕續之關也。

季氏使閔子騫爲費宰章

閔子辭季氏費宰之命。載於論語。其不肯委身季氏
明矣。而家語執轡篇有閔子爲費宰問政之文。以此
知家語所記多非事實也。以仲弓視之。仕季於閔子
無害。然使始固拒而卒就之。論語何爲而記其辭乎。

回也不改其樂

樂亦在其中。回也不改其樂。並是對人不能樂而言。若孔顏之心。何自知有樂也。譬如道術之士。及精力壯強者。遇盛暑嚴冬。體氣自若。顧視凡人。不勝其苦。乃知異矣。

子謂子夏曰章

註云君子儒爲己。又云遠者大者。非是各爲一義。不相統貫。蓋惟爲己乃所以爲遠大。中庸末章以尚絅闡然爲入德根基。漸次充擴。以馴致乎篤恭天下平之盛。何遠大如之。爲人而學者。自私自利。不去於心。

雖能立功業。致聲譽。而其為卑暗淺小甚矣。

子游為武城宰章

留心人才。是聖賢至公至大之心。不論世道盛衰。皆是如此。

此二事自是持身常法。若道他古怪不近人情。便是流俗見識。

不由徑非公不至。士人立身行己。原該如此。非諛僻之行。而子游顧取之也。

禮言送喪不由徑。然則非送喪有徑可行。由之無言。如澹臺子華。亦是賢者卓異之行。非謂由之者便為

邪僻。

子曰孟之反不伐章

孟之反不伐。一事可取。不論其他。若是僞爲不伐。聖人必有以察之。亦不得以其迹之似而姑取之矣。如晏平仲亦是真能久敬。所以取之。非周旋世故之術。幸免于隙末。而終便。得聖人過也。

子曰誰能出不由戶章

道不離事物。處事接物。而不察其理。不盡其誠。是莫由斯道也。

文勝質則史

儀禮云。辭多則史。少則不達。注史謂策祝。按論語文勝質則史。正與此史字同。若太史內史皆掌策書也。文勝質則史。註云掌文書。如大史小史掌邦典邦志是也。或云府史胥徒之史非也。

子曰人之生也直章

生理本直。便是孔子之言性善。罔非天生罔都是人爲害之。

樊遲問知章

樊遲未必有窮極幽深之意。其於鬼神恐只是感於禍福之事。如臧文仲居蔡之。

鬼神能爲禍福。此等有不可知者。至於往來屈伸。誠感誠應之理。則無不可知也。

先難該一切言。雖至麤至小之事。但盡心爲所當爲。而不計其利。即此一念一事。是亦仁也。以道言。則無精粗。無大小也。伊尹之一介不取與。孔子之委車乘田。會計當牛羊茁壯而已。是也。下之則如漂母云。哀王孫而進食。豈望報乎。亦其近似者也。必以克己復禮。天下歸仁言者。非孔子當日教樊遲之旨也。

子曰知者樂水章

達於事理之謂知。若熟於利害。長於機變。此一輩人。

不謂之知。其動也。徒爲紛擾而已。彼其心長戚戚之不免。何有於樂。安於義理之謂仁。若閉絕物感。專守神炁。此一輩人。不謂之仁。其靜也。耽於空寂而已。雖得養生之術。與深山之木石等耳。豈足貴乎。

若聖與仁。仁以爲己任。仁字極大。非一切字可對。此處仁知並舉。却不甚大。如繫辭言仁者見之謂仁。知者見之謂知。猶陰陽之各一其德也。

孫思邈曰。仁者靜。地之象。故欲方。知者動。天之象。故欲圓。按人稟天地之全德。未有優於仁而匱於知者。故宜方圓並用也。方故有常。圓故無滯。

子曰齊一變章

齊魯去道。雖有遠近之差。然聖人之意。總見二國皆可至道。魯尤易而齊亦不難。要在於能變而已。齊一變可至魯。豈欲其止於魯而已哉。由此而進於道。孰能禦之者。此立言之意。

齊魯不會做。不肯做。只有夫子會做。却又不得到手。苟有用我之意。自見于言外。

變齊至魯。非是事事如魯。謂齊之風聲氣習。大殺不善者。一洗去之。可得似魯。魯所僅存之禮教信義。齊亦有之也。至如魯之衰弱。祿去政失。豈謂一變之後。

此不車曰言
齊反同之耶。

功利夸詐。害道爲深。可知秦漢以後先王之道未嘗一日得行於天下也。

子曰觚不觚章

洪慶善曰。古者獻以爵。酬以觚。此夫子因獻酬之際有所感也。此言最爲得之。蓋不必正當獻酬皆發此歎。必是目擊此器。人皆名之曰觚。實乃非觚。故因而歎之。非是無端尋此話頭來說。論語所記夫子之言。在當日皆有箇根因。今雖不可得知。要當默識之爾。董子曰。名者聖人之所以真物也。觚不觚。名非其名。

矣。夫子所以歎之。

韓詩說。二升曰觚。觚寡也。飲當寡少。是觚者取寡爲義。所謂孤寡不穀。孤寡義相近。而孤者單身。是寡之極也。

宰我問曰。仁者雖告之曰。章

宰我憂爲仁之陷害。意謂仁道雖美。也有行不去處。故設此問。不知仁道正不須如此。如宰我之說。乃好仁而愚者耳。若謂宰我不知從井救人之非。而真欲爲此等之事。則失其旨矣。

宰我子貢。穎利畧相似。撰得此問。是其穎利處也。所

謂憂爲仁之陷害者。正是求善全之道於聖人。謂宰我好仁而愚。非其質矣。

可不可。俱就驅遣君子者說。

子曰君子博學於文章

約之以禮。謂視聽言動。皆收束入規矩準繩。一於禮則約矣。約非大本大原。渾然一理之謂也。博文約禮。皆下學事。故曰可以弗畔。

子見南子章

謂孔子不得已而見之。非也。聖人豈受人迫促者。謂禮當見而見之。亦未盡也。聖人豈拘此禮者。只是聖

人自覺得可見而見。非他人所及。亦非他人所知。
子見南子。丹鉛總錄謂矢者直告之。非誓也。此與蔡
謨陳字之訓相近。不知予所否者。固是誓詞。不必別
為之解也。註引所不與崔慶者。正以明此矢為誓。非
臆說爾。

揚子^法言仲尼於南子。所不欲見也。陽貨所不欲敬也。
見所不見。敬所不敬。不詘如何。或曰。衛靈公問陳。則
何以不詘。曰。詘身將以信道也。如詘道而信身。雖天
下不可為也。按揚子之言詘身。若柳下惠之降志辱
身。其言未為過也。注家以揚子臣王莽。擬孔子敬陽

貨則不可同日而道矣。又云所詘形也。於神何嘗撓哉。如此則褚淵馮道之徒亦將曰吾神不撓。吾與孔子同道也。豈非所謂賊德之尤者哉。

子貢曰如有博施於民章

宰我是憂為仁之陷害。疑這仁是做不得的。緣宰我是天資近薄一邊。觀短喪章可見。所以如此。子貢則不然。原有一視同仁的想頭。觀亦欲無加之言可見。但其博愛為仁。不知求之切近。則亦只成一箇虛願而已。

有將病字方字扭合者。其謬不可不辨。堯舜猶病。止

是所以爲聖處。他這箇病。如何可醫得。惟人心痿痺之病。除非恕之一味。可以醫得爾。醫得這痿痺之病。那堯舜猶病之病。覺得漸漸深重了。

猶病二字。是不自滿足之心。若無此心。便不成堯舜。或乃以方字病字相扭合。如治病者之用方。竟看成病痛病字。謬矣。

仁者已欲立而立人。已欲達而達人。旣以爲已。旋以爲人。雖同念並興。早已二之。是不然。蘇子瞻曰。病者得藥。吾爲之體輕。飲者困于酒。吾爲之酣適。蓋專以自爲也。斯言足相發明。然則不欲立達人者。謂之能

止才軒四言
自愛可乎。其神必泣矣。

一篇訂頑。只要人識得大原。存得這箇意思。却去做切近真實工夫。方可漸漸擴充。所謂頑者。即痿痺不仁之別名。如已欲立達。不知人亦欲立達。自私利。非頑而何。非痿痺而何。

手足痿痺為不仁。言痛痺不相關也。俗謂之麻。此之不仁。屬於血氣。唯知立達已。不知人亦如是。是理之心。壅閑不流也。以血氣明義理。故曰最善。

子曰默而識之章

默而識之。無他。切而已。不切則欲不遺。亦不得已。

默只訓不言。謂不靠着言。而自能不忘於心。尤爲堅固耳。非禁絕語言文字。只守箇黑窅窅地也。

惟刻刻防其厭倦。所以更無厭倦。若自覺得無一毫厭倦。更不用省察。不用策勵。則厭倦之根。已伏於不知不覺之中矣。則亦非所以爲聖人矣。

默而識。多學而識。多見而識。皆當作記字解。與君子多識前言往行。正同。邵康節以多見而識之爲別之。云雖多見。必有以別之。義非不精。但與諸處識字不能一例。故集注不用之。

子曰德之不脩章


樂以忘憂。憂字與不堪其憂。仁者不憂。君子不憂。不懼之憂同。乃人心之私憂也。此處憂字與君子有終身之憂同。即君子存之注。所謂戰兢惕厲。聖賢之所以為聖賢者。全在乎此。

法言云。顏苦孔之卓。苦字亦下得好。苦即憂也。微特顏子。聖人亦有苦。

或疑聖人豈有一毫不善。既無一毫不善。乃復憂不能改。這憂便不似真心實意了。若道聖人果自覺有不善。未及改處。又恐未安。答曰。世上一種人。不憂到極處。便是不善到極處。不肯改到極處。所謂下愚不

移者無他。只是不憂而已。聖人只是憂到極處。便是能改到極處。能改到極處。即是無不善可改。然其所以此者。無他。憂而已。真心實意憂而已。是吾憂也。聖人豈欺我哉。

此本軒四書說卷之三



此木軒四書說卷四

金山 焦袁熹廣期 著

論語三

子之燕居章

子之燕居。閒暇無事。胸中太和。自然盎溢於顏貌之間。有不可揜者。其或有所感觸。如居夷浮海之歎。則不容不改其常度矣。譬如天道。以風和日麗為常。

子曰甚矣吾衰也章

孔穎達曰。莊子意在無為。欲令靜寂無事。不有思慮。故云聖人無夢。但聖人雖異人者神明。同人者五情。

五情既同。焉得無夢。故禮記文王有九齡之夢。尚書有武王夢協之言。按孔君此論精矣。然聖人豈特不能無夢而已。聖人五情懇惻。倍萬恒常。其夢亦自異於人人。周公之見。其精誠之極乎。

呂氏春秋有云。孔某墨翟。晝日諷誦習業。夜親見文王。周公旦而問焉。用志如此。其精也。按如呂說。是以孔子精志於學。故夢見周公。然孔子自言發憤忘食。不知老之將至。則是無耆而衰也。故不如集註之說。為得之。

游於藝

柳公權云。心正則筆正。非苟爲諷諫而已。學書之要。無出於此。未有心不正而能工於書者也。如射及投壺彈琴等。聖人所制以教人者。其意皆是如此。故曰游於藝。藝亦道也。

舉一隅三句

禮記開而勿達則思。邵子曰。願先生微開其端。不善學者。憚於研索。求師盡言。雖日聞一。所不聞。亦何益乎。不以三隅反。亦由不肯精思。安於昏昧致然。與不憤悱者病則均耳。是知受教之地。不存乎質而存乎志也。

臨事而懼

臨事而懼之懼。是敬慎意。勇者不懼之懼。是怯懦意。將字義看得分明。便不相碍。

三月不知肉味

不知肉味。只是極形容聖心之專一。不必以固滯不化為疑。若聖人真箇全然不知。門人又何緣得知。只是見其學之之專。更不及他事。故以此為言耳。

冉有曰夫子為衛君乎章

怨猶悔也。猶俗云懊恨也。非以去國窮餓難堪而疑其怨。或者夷以尊父之故。致國於弟。而齊卒不立。無

以成先君之志。已又不得立。重傷先君之心。伯夷不免有遺恨。齊不自立。廢先君之命。而夷又不肯立。無以成已之志。齊亦不免有遺恨。如此。則去國未可輕易。而輒之立。猶不爲無說。此子貢再問意也。

求仁得仁。是夫子看得夷齊如此。非二子將仁字橫據胸中。始而求。繼而得也。只是心之所不安者。決不肯一日居。行其心之所安而無憾。便是得仁也。

叔齊不肯立。不從父之亂命。亦所以成父之德。知此則衛輒不得以靈公之命爲辭矣。靈之命輒與否。不足論也。

子所雅言章

聖人所常言。實不出此三者。若謂雖不言詩。亦是詩之理。則雖不言易。亦孰非易之理。何以不云雅言易乎。

葉公問孔子於子路章

知人者。上喆之事。非君子所以自任也。有以其人之所至來問者。不辭讓而對。是以上喆之所能者。謂爲己能也。人未易知。未易言。又況由賢人而上之。至於聖人。而易知之。而易言之。可乎。葉公問孔子於子路子路不對。孔子聞而勿善也。語之曰。女奚不曰。其爲

人憤忘食樂忘憂。不知老之將至。讀者因以子路之
不對真失之也。則亦未之思矣。衛將軍文子問諸弟
子之賢於子貢。子貢再辭。然後對以所知。以子貢之
明達。夙擅方人之長。然猶如此。甚矣其重也。況子路
哉。況所問者孔子哉。必也。子路固辭之。葉公固問之。
然後以其所知者謹而告焉。而又不聞也。則子路之
不對。其爲當然。無足疑者。若孔子之自言。乃假是以
明已好學之至。尤可見其誨人不倦之實。至子路承
問於葉公。雖能言聖人所欲言。猶弗敢也。爲其不讓
之過甚也。

楚縣尹稱公。是爲僭矣。齊未嘗僭王而有棠公。何也。蓋亦當皆之通稱。邑大夫卑。不嫌同君稱耳。

子曰三人行章

兩人一善一不善。或不善人有些善。或善人有些不善。無不可從。無不可改。此師之所以必有也。

所謂必有我師者。正謂人能心存爲己。無往非可法可鑑。從且改之。若受教於師然。爲益弘多也。是則以師之有益。譬三人行之。亦可獲益。非謂求師只在道路間。不須更擇一人。北面而事之也。若不從師。講明義理。即善不善將有茫然不辨者。又何以從且改乎。

學誠切於爲己。遇其人有善不善。自是黑白較然。待向那人身上。苦苦搜求檢察而後得也。然必曰擇者。蓋詳慎之心不可無。

子曰天生德於予章

孔子知桓魋不能違天害己。然未嘗不微服而避之。所謂知命者。不立乎巖墻之下。若人方欲殺己。乃堅坐不動。而曰彼無如予何。則無是理矣。

子曰二三子章

聖人之心。不息於學。聖人之身。與道爲體。無行不與者。此也。爲不厭。誨不倦。蓋無肯無地而不然。猶懼學

者之不察。如子張問與師言之道與。則深喜之而告以固相師之道。

子釣而不綱章

或云不綱不射。聖人只是無心。愚謂此正見仁人之本心。謂聖人不沾沾以此爲仁則可。若謂全然無心。則將曰綱亦無心。射宿亦無心也。而可乎。必不綱必不射宿。則非全然無心可知。

弋不射宿。但以出不意。故不忍爾。有謂釣弋取物難。綱射宿取物易者。是不知射飛爲易。射宿反難也。取之易非聖人所惡。

子曰蓋有不知而作之者章

多聞見擇善而從且識。聖人雖生知。故非虛設此言。無事實也。然自聖人爲之。則所謂學不厭智也。如舜之大知而好問察隱惡揚善。以至執兩端而用其中者。與此無以異也。若學者依此言而盡其功。至於真積力久。則有所謂雖愚必明者矣。豈不可以爲知之次乎。所謂次者。非是無得於心。以其由聞見考索而入。故謂之次耳。

聖人實是無所依倚。神明默成。而又從聞見擇識上用功。所謂生知而未嘗不好學也。但其自承當者。則

只是求知之學耳。

凡言次者。謂迫近不隔遠也。如好學近乎知。亦謂於知爲最近。非差得相近。終莫能至之。

互鄉難與言章

誠心要進見。更無別樣念頭。即此是潔。唯何甚。亦歸斯受之之意。

子與人歌章

周禮疏引季札請觀周樂。而云爲之歌齊等。亦是不依琴瑟而云歌。此皆是徒歌曰謠。亦得謂之歌。若依琴瑟謂之歌。即毛云曲合樂曰歌是也。

子曰若聖與仁章

人知聖人之自謙。爲聖人之不虛。不知聖人之自任。乃聖人之大勇。所以爲千聖之絕學。爲萬世關學。而其功有賢於堯舜者。全在此不厭倦兩言。故中庸言天道人道。惟夫子實兼有之。不然。夫子一身自聖自仁。使後學有登天之數。非天所以生聖人之意矣。夫子自言非聖仁。但能爲之不厭。又教人使共爲之。先難而後獲也。公西華乃歎曰。正惟此不厭倦者。弟子所不能學。誠知聖人純亦不已。一天道之不息。非勉強力行所得至。然而夫子之意。不喜其作如是言。

地有皮

馬穀精

不能是誰不能乎。正謂非有不能。直不如已之憤忘食樂忘憂。故曰語之不情其回也與。又子貢言學不厭者智也。而夫子之意。正以學不厭則智自生。好古敏以求之。雖愚必明也。總之諸弟子所見者。聖人之於天道命也。夫子以身立教。則惟曰篤志於學。盡性以至於命。人能弘道者也。

呂氏春秋子貢問孔子曰。後世將何以稱夫子。孔子曰。吾何足以稱哉。勿已者。則好學而不厭。好教而不倦。其惟此耶。按此與論語若聖與仁。及孟子公孫丑章語意相參錯。所謂勿已者。猶言無已。則有一焉。

子疾病章

周禮疏引誄曰云云。生人有疾亦誄。列生皆德行而為辭。與哀公誄孔子意同。

子曰奢則不孫章

聖人意在惡不孫。註言救昔之弊者。當昔如舞佾歌雍。皆不孫之事也。其實奢之害大。自是一定之理。不論風尚如何。故曰國儉示之禮。不事國儉示之奢也。假如世方儉固。有人問奢儉孰愈。豈得言與其固也寧不孫乎。

子曰君子坦蕩蕩章

小人長戚戚。何必王巨君李林甫一輩。受此極惡。謂當懲創乎。惡惡不如惡臭。好善不如好色。雖終身行善。亦近名耳。彼其戚戚之根。故自在。聖人發言之旨。似應在此也。

子溫而厲章

溫而厲。其溫也不偏於柔矣。威而不猛。其威也不偏於剛矣。恭而安。其恭也自然而中節矣。只是極形容聖人溫威恭之妙。

歐陽圭齋云。溫而厲一辭。若總下兩句。所謂威而不猛。恭而安者。威自厲出。不猛有溫在其中。此易曉也。

威而不猛。可總於溫厲恭而安。何所附屬。曰書言恭作肅。又有所謂嚴恭。嚴也肅也。非厲而何。且二者非可久之道也。持之而安。惟溫而厲者能之。豈非互有所發明乎。按此言聖人盛德容貌。只在一音。非是三種圖像。溫而厲及恭而安。自可互相包爾。爲溫而厲一句意有未盡。故反覆言之。歐氏此段其義甚精。

子溫而厲。子之燕居。等章。初無事跡。必熟察而形容之。其有得於昔行物生。無行不與之旨深矣。

子曰泰伯其可謂至德也已矣。章

繁露言泰伯至德之侔天地也。上帝爲之廢易姓而

子之讓其至德。海內咸歸之。泰伯三讓而不敢就位。董子廢易姓之言。似謂泰伯以不立故延商之祚。是為讓商。非讓季歷。善發孔子之意者也。

泰伯文王心事略同。泰伯之難在始。文王之難在終。

君子篤於親節

君子篤於親則民興於仁。師古以為孔子之辭。

周禮以賓射之禮親故舊朋友。註王之故舊朋友為世子昔共在學者。

曾子有疾召門弟子曰章

曾子之啟手足。即是守身之效。非但保其形體而不

虧行又別爲一事也。但曾子引詩之意。則但以保身言之。而守身固在其中矣。

曾子有疾孟敬子問之章

動容貌斯遠暴慢矣。謂不動容貌則已。一動容貌斯必莊必敬。無暴慢之失矣。君子動容貌之道。所以爲可貴也。知如此之爲貴。則所以操存省察。而求至乎此者。自不容緩矣。操存省察之功。在平日。亦在臨告。然皆在此三言之外。非以斯遠暴慢之斯字。爲用意用力於此也。朱子或問甚明。

三斯字俱就現成說。隨所發而皆合乎道。無適不然。

故足貴也。工夫却在平日。

正是整齊振肅意思。正字中有真有偽。非便是好字。孔子言俎豆之事。是舉小以該大。此遵豆之事。則專指器數之末而言。

將死而言善。常人固有此理。聖賢則何須如此說。至於大奸大惡。亦不盡然。觀溫公論分香賣履之語可知。

曾子曰。以能問於不能。章

顏子之問。實有得益處。正如舜之好問。樂取於人以爲善。非一味謙下而已。

量不期大而大。方是真大。世之君子。要做箇大的模樣。如所謂容貌若愚。寬深不測。都是有我之私。去顏子地位。奚啻天淵。

犯而不校。陳紫峰謂萬物既皆我。則我將誰校。此言疑亦有病。所謂不見物。我有間者。謂無物我二視之私意。欲立立人。欲達達人。是也。固非謂人即我。我即人。冥然不辨也。犯而不校者。不與之校。是非曲直。蓋亦是細小不足計校之事。故忘其是與直在已。非與曲在人。無動於心也。或疑如此。則不校猶非太難。不知細小之事。外雖若置之。而中不能無動。是即校也。

怒於甲者不移於乙。人知乙無可怒。而不能不遷。是知克己之學。非苟知之難。允蹈之難。故曰嘗從事於斯矣。是蓋曾子見賢思齊。自覺有不至而厚自厲也。不見物我之有間。是無彼我之私。非謂人便是我。我便是人也。人便是我。我便是人。雖顏淵於夫子。亦無此理。無彼我之私。則雖於匡人於桓魋。亦只是如此。無我不是全無主張。只是純乎天理。以能問不能。此五句都是曾子見得他如此。不是顏子自己。有箇若無若虛不校的意思也。

曾子曰。可以託六尺之孤。章

託寄不奪。俱從學問得來。不單靠氣魄氣節。方是箇君子。

論語六尺之孤。鄭注年十五已下。疏云。鄭言已下者。正謂十四已下。亦可以寄託。非謂六尺可通十四已下。

子曰興於詩章

此章要根小學來說者。蓋古者之教。十年學幼儀。十三學樂誦詩舞勺。成童舞象。二十始學禮舞大夏。此數年中。已立得箇基本了。從此日漸擴充。工夫愈深。進則其得效之次第有如是者耳。非謂小學只做一

山不車口言
番工夫。便一生安坐享用。更不消費力也。興立成是大學始終之次第。謂其不離乎小學則可。謂小學可以盡得此三項工夫。則不可。

陳同父云。孔子以禮教人。猶必以古詩感動其善意。動盪其血脈。然後與禮相入。未與於詩而使立於禮。是真嚼木屑之類耳。按此論先興後立之意甚好。

子曰好勇疾貧章

知好勇疾貧者之易於作亂。則亟當思所以處之。知疾不仁已甚者之必將致亂。則亦當思所以處之。立言之意。皆爲主持世道之人而發。不仁有大小。有淺

深。有不容不誅殛者。有小懲已足者。亦有當蕩然其赦者。視事勢何如耳。未可爲一定之說也。
曰疾之已甚。便是過當不合理處。非謂小人亦當容養他。除惡務盡。只要無私當理。何得謂之已甚。何亂之敢生。

子曰如有周公之才之美章

周公之才。只訓智能技藝。不可將周公一生大作用。都放才字甲裏。才難之才。訓德之用。乃是經綸天地非常之才。兩才字大小天淵。

橫渠云。大則不驕。化則不吝。夫大而化之。謂聖。然則

驕吝二者。惟聖人爲無之盡也。今人知驕吝之不美。不肯居其名。若仔細體勘自家病痛。蓋有不知其然而然者矣。

子曰三年學章

學所以得祿。故三年學而能不至於穀者。爲不易得。三年言其久者。人之學不論成否何如。要之利祿之念易萌也。非謂學已大成。有得祿之具。而不志之爲難。若論學之功夫。只三年那便得到大成地位。所謂不至於穀者。通三年首尾而言。中間皆时刻刻俱要體勘。非謂滿此三年。乃當不至穀也。

學所以得祿。故三年學不動心於利祿。爲不易得。非謂學至三年。學已大成。而久處困約。無感憤不平之意。爲不易得也。論心術隱微。則三年爲久。論學術工夫。則三年算不得久。

子曰篤信好學章

守死。以死守之。不可奪。

危亂之邦。其君相不能用人聽言。雖有扶危定亂之術。無所復施其力。故不入不居。非特爲避禍而已。

子曰不在其位章

孔子對哀公。只云舉直錯枉。不說某某當舉。某某當

錯。三桓當如何。對景公。只云君君臣臣父父子子。不說陳氏當如何。公子陽生等當如何。此不在其位不謀其政之義。

狂而不直

狂而不直。狂字。是人之病。與進取之狂不同。

子曰大哉堯之爲君也章

聖人克明峻德。盡性而已。盡性者。則天之實也。以聖人之德。居首出之位。則有光四表格上下之功化。故夫子仰歎之。

聖人贊堯之大。至於則天。亦只据尚書所記述。非能

鑿空而作是言。此不惟見前聖後聖。心德相契。精微之極。亦正足明唐虞史臣。見而知之。所以片言隻句。貌得聖帝之真。至爲顯著。若不爾者。雖夫子亦何自如親見之。

舜有臣五人而天下治章

唐虞之際。乃盛族周。見得才難。十人之數。取足於婦人。又是難中之難。昔說以唐虞二句。專說盛。下二句。方說難者。非。

自唐虞至周。人才極盛。僅一再見。夏商兩朝。皆所不逮。此所以歎才難之語。不誣也。下文又言不足十人。

之數。愈見其難也。或誤認註意。以唐虞二句爲歎其盛。下二句乃見其難。然則無此婦人。十人數足。遂不見爲難乎。非其旨矣。註是才之難得也。乃總結之詞。有婦人焉。漢儒謂文母也。程子以子不臣母。用邑姜易之。按武王所稱十亂。皆文王昔任用之臣。武王因而言之。不緣文母一人。改其舊稱。謂曰十臣。亦何所嫌。若專舉文母。則自無稱臣之理。漢儒於此。非是不加三思。率爾訓釋可知。

歎文王至德。分明見武王有懋德矣。不必曲爲回護。然所謂懋德者。自是聖人。心上有指不過處。不可以

後世取天下心腸。揣度聖人也。

率商之畔國以事紂。則不惟文王一身。自守臣分而已。欲使六州之人。皆凜然知有君臣之義。而不至於潰散也。是皆商之天下。尚未有土崩之患。使紂能悛於厥心。內撫其人。外懷諸侯。則商道猶可以興。此文王之心。夫子所以歎其至德也。周之德。分明指文王言。有謂武王事之十三載。亦在其內者。其說似巧而拙也。若然。十三載以後。德便不至。亦不足以尊武王矣。湯武有慚德。自是聖人之不幸。夫子豈得而掩之。子曰禹吾無間然矣。章

此所謂間。乃是識有不周。力有做不徹處。非如衆人私欲之累。大爲心體之害也。以此觀禹。而亦無之。方見聖人盡道處。若是大段不好的。何消說得。

當儉者不儉。當勤者不勤。此不但是間。無足論矣。或凡事偏於儉。或凡事偏於勤。弊亦不小。或當儉而儉。偶有一處不儉。或當勤而勤。偶有一處不勤。未免猶有可間。故必合此數事觀之。然後見其無徃而非中道之流行。猶所謂天下莫能破焉也。

卑宮室。是仍前之制。無所增飾。有圯壞者。則亦脩葺之。如此。方是中道。若有意要樸陋。至於已甚。便非中道。

食衣服亦然。後世有焚雉裘者。方其焚之之心。已有間了。安望其克終。若漢之孝文。其庶幾乎。

達巷黨人曰章

達巷黨人。史記加童子二字。項橐七歲爲聖人師。是相傳有此言。或者孔子偶有所問於童子。童子答之人。遂以此童子爲聖人師。此等事。容有之也。

執註言專執。謂專精一藝也。若學御又學射。則是二事。二即不得言執。有謂射御可兼執者。是失言也。

子曰麻冕禮也章

儉吾從衆。非謂冕服事小。不若拜下之禮所關者大。

故俯而從之。正以變古而不戾於禮。故聖人有取焉耳。若使變為詭竒之服。聖人豈亦以其事小而從之哉。

周禮純帛。注純實緇字也。依字從系才。疏引論語今也純儉。云絲理自明。即為色解之。

子絕四章

子絕四。但云無私。或云無我。亦得。記者乃更剖分為四。分外精細。蓋從尋常人心術隱微處體察。見得人人有此四者。最難淨盡。以此去看聖人。真乃全體晶瑩。循環周流。莫非天理。故記之如此。

不但是常人意必固我之私。聖人無之。即伯夷之清。伊尹之任。柳下之和。未免倚於一偏。是亦所謂意必固我也。至孔子則無可無不可。皆中而已。安得更有此四者。此所以爲無之盡也。

子畏於匡章

孔穎達云。孔子過匡。匡人以兵遮而脅之。從者驚怖。故設此言以強之云云。孔子自比其身。言已有文王之道。下文云云。天若未喪文王之道。必將使我制作。匡人不能違天以害已。按杜孔所云。使孔子制作者。謂春秋未成。已有此志。故於此發其端。此自爲傳春

山不車四言言
秋立義。孔子之意。要未必爾。若使制作已備。遭離此難。匡人豈使得而殺之乎。

唐末蘇拯作頌魯詩序云。聖人刪詩定禮。出沒行藏。承天之意。非由命焉。不然。論語不曰天之未喪斯文。匡人其如予何。又曰下學而上達。知我者其天乎。以斯明矣。此見得聖人與天通一無二。

陳留志。孔子囚於匡。蓋圍之使不得去。即言囚矣。

大宰問於子貢章

越絕。語為人覽聞辨見。目達耳通。諸事無所不知。身納於吳。以入郢功。位大宰。語之才如此。其心悅夫子。

稱之曰聖。宜也。語與子貢言語交關。傳有明文。論語特不著其氏名耳。必非宋之大宰可知。

陳吳皆有大宰語。朱註言或吳或宋而不及陳。以無關大義故略之。然問於子貢者。當是吳大宰也。

多能只是釣弋射御之類。若刪定贊脩。自是一生大事業。不得以此爲多能中事。

將猶殆也。將字意當在天縱之上。而既以固字發端。無可著此字處。故置在中間耳。

固天縱之將聖。註云謙退不敢質言者。蓋唯聖知聖。非學人所能知。若作斷然之辭。則是謂己之識量亦

去聖不遠矣。故不敢也。所謂坐無尼父。焉別顏回者。即此意也。自孔子以後。非便無聖人。可匹夷尹惠之徒。正以不可將聖字去。品目人故爾。

子貢所見。高於大宰甚遠。然玩其詞氣。原是順大宰之意而申說之。却似小異其詞。而不異其意者。此賓主對答之體也。今人不知。竟謂子貢開口便駁倒大宰。以為快事矣。

子曰吾有知乎哉。章

聖人看得天下之義理無窮。一人之聰明有限。故曰吾有知乎哉。非謂毫無所知。渾渾沌沌如嬰兒也。

竭兩端語罷而道在其中。語下學而上達在其中。

雖少必作

史記見齊衰瞽者。雖童子必變。易少字言童子。意更明了。可知以少為坐者非也。

顏淵喟然歎曰章

仁山金氏謂略見道體。而集註言深知者。蓋對卓立言。則此是略見。其實即是深知。猶子貢所謂如天之不可階而外也。當昔弟子。蓋有終身不曾見得者。夫子循循然善誘人。漢人多作恂恂。蓋傳授有異。然以恂恂訓恭順。不如循循有次序之為得也。

博文約禮。古之教者皆如此。非夫子創爲此條例也。
觀周禮可見。

既竭吾才。是顏子自言其做工夫。無一毫偷惰處。非
謂博文約禮做得已盡。更無遺憾也。須知欲罷不能。
既竭吾才。兩句只如一句。竭非竭涸之竭。謂到此更
做不得。如所謂臣力竭矣。光景者。亦非也。欲從末由。
是無所用其力。至如博文約禮功夫正好做。顏子亦
正饒力量在。

漢書卓爾。非世俗所知。顏注卓爾。高遠貌也。按論語
如有所立卓爾。正謂其高遠也。揚子曰。顏苦孔之學。

正是苦其高遠爾。此苦惟顏子親嘗之。曾有而下。蓋未解斯味也。

欲從末由着力不得。是着不得勉強之力。非無可做工夫處。只恁休也。工夫更綿密。更入細。所講如此。未見其止。此中消息愈微耳。

子疾病章

子路使門人爲臣。若不得夫子之言。而今學者亦未便覺得子路之非。先王之禮。固有定分。而禮又有義起者。安知治聖人之喪。不可以門人當家臣。此義理之所以難精也。

使門人爲臣。議及喪事。則病甚可知。然子路存焉。則非七日將終之病也。請禱之事。則或即在此。豈不可知耳。竊疑夫子雖病甚。何至便議及門人爲臣等事。意者議出於子路。而諸弟子亦欲聞於夫子。可則行之。故先商論及此歟。

子路尚存。則病得痊矣。使門人爲臣。或子路自請於夫子。或他弟子以聞。蓋古人不以死爲諱。故治喪之事。皆得於生前議之。後之達者。自作終制。其子遵而行之。爲可法者也。

或問使夫子疾病不問。非禮之臣。遂以奉終。豈不仰

累聖德。胡氏曰。夫子倘至大故。耳目所接有異。必
正之矣。聖人方寸。決不以病而懵也。此說甚妙。與易
筭事正可相參。然愚謂倘有此等事。不使得接於聖
人之耳目。則如之何。要之於聖人無損。如厚葬顏淵。
門人自任其咎。不干顏子身上事。易筭事在毫髮間。
愚固亦嘗深思而得其說矣。假令童子不言。曾子不
聞。此苦心氣已絕。思慮覺察。俱無所施。雖不得易。不
害其爲正而斃也。所謂死而後已者。如是而已。聖門
諸賢。多知禮明道之士。固決不令子路成此非禮之
舉。然以爲足累聖德。則亦過也。正如後世謚文宣。加

山不車口言
三
衮冕甚而釋老之徒。援此入彼。亦豈有損於聖人之
萬一耶。

無臣而為有臣。只此一言。折紛紛之口。破庸人之惑。
由此而論。沃丁葬阿衡以天子禮。成王賜魯重祭。使
誠有之。則二君者。其愚而自用乎。細人之愛乎。陷於
欺天而不知其非者乎。

子貢曰有美玉於斯章

子貢舉藏與沽兩說為問。不知不覺。落出箇求字。非
便有炫玉求售之意也。自聖人言我待賈者也。然後
知子貢之言求為有弊耳。

子貢言求善賈而沽。意只在沽。謂不韞匱而藏。則惟求善賈而沽耳。非欲如世人之抵掌曳裾。屈節枉道以求之也。然才說一求字。便不能無病。便是銜耀之心未忘。夫子所以云我待賈者也。亦所以教子貢也。

子欲居九夷

居夷浮海。有目不忍見。耳不忍聞之意。

子在川上曰章

逝者如斯夫。不舍晝夜。發憤忘食。樂以忘憂。純亦不已。聖人之所以與道爲一也。語之而不惰。三月不違仁。顏子之所以未達一間也。

鳶飛魚躍。見道之無物不有。是橫說。不舍晝夜。見道之無嘗不然。是豎說。然中庸亦有無嘗不然意。論語亦有無物不有意。學者做工夫。亦須是隨事精察力行。而體之以不息。曾子之言弘毅是也。

逝者如斯。不可說聖人於此有悟。聖人不待觀此而始悟也。

子曰吾未見好德章

存疑云。聖人此歎。其在顏氏既沒之後。曾子未長。之前乎。愚謂聖人望人進德勉學。其心自是迫切。不容無過甚之辭。所謂未見者。歎其甚難得。所以警學者。

耳。不必天下果無一人。然後說未見也。正使顏曾冉
閔而在。亦不妨如此說。不為枉屈了他。吾未見剛者。
未見內自訟之屬亦然。

此木軒四書說卷之四

本以內自外之說亦然
因以爲不致以之說亦然
此不致以之說亦然

